

ა(ა)იპ “საქართველოს საპატრიარქოს  
დეკორატიული მებაღეობის საზოგადოებრივი კოლეჯი”

(წესდება)

თავი I

ორგანიზაციის სტატუსი; ორგანიზაციის მიზნები

**მუხლი 1. ორგანიზაციის ორგანიზაციულ-სამართლებრივი ფორმა. სახელწოდება**

1. წინამდებარე აქტი წარმოადგენს წესდებას კერძო სამართლის არასამეწარმეო (არაკომერციული) იურიდიული პირისა (შემდგომ ტექსტში – “ორგანიზაცია”).
2. ორგანიზაციის სახელწოდებაა: “საქართველოს საპატრიარქოს დეკორატიული მებაღეობის საზოგადოებრივი კოლეჯი”.
3. ორგანიზაცია არის პროფესიული საგანმანათლებლო დაწესებულება – პროფესიული კოლეჯი, საზოგადოებრივი კოლეჯი, თანახმად პროფესიული განათლების შესახებ საქართველოს კანონისა.

**მუხლი 2. ორგანიზაციის იურიდიული მისამართი, ორგანიზაციის ხანგრძლივობა**

1. ორგანიზაციის იურიდიული მისამართია: ქ. თბილისი, ძველი თბილისის რაიონი, ქვემო “ელიას” დასახლება, წმინდა სამების საკათედრო ტაძრის კომპლექსი (საკადასტრო კოდი: №01.17.01.005.007).
2. ორგანიზაცია შექმნილია განუსაზღვრელი ვადით.

**მუხლი 3. ორგანიზაციის ბეჭედი.**

1. ორგანიზაციას შეიძლება ჰქონდეს ბეჭედი.
2. ორგანიზაციის ბეჭდის დამზადების შესახებ გადაწყვეტილებას იღებს ორგანიზაციის გამგეობა, რომელიც ადგენს ბეჭდის ზომებსა და სხვა რეკვიზიტებს.
3. ორგანიზაციის მიერ გაცემულ დოკუმენტებზე, ან ორგანიზაციის მიერ ხელმოწერილ სხვა დოკუმენტებზე ორგანიზაციის ბეჭდის არსებობა, ან არარსებობა არ წარმოშობს რაიმე სამართლებრივ შედეგებს და მას აქვს მხოლოდ დამატებითი დაცვითი ფუნქცია. დოკუმენტების ნამდვილობისათვის გადამწყვეტია ორგანიზაციის წარმომადგენლობითი უფლებამოსილების მქონე პირის ხელმოწერა.

**მუხლი 4. ორგანიზაციის დოკუმენტების რეკვიზიტები**

1. ორგანიზაციის მიერ გაცემულ ყველა დოკუმენტზე (წერილზე) უნდა მიეთითოს:
  - ა) ორგანიზაციის სრული სახელწოდება;
  - ბ) ორგანიზაციის იურიდიული მისამართი;
  - გ) ორგანიზაციის წარმომადგენლობითი უფლებამოსილების მქონე პირების თანამდებობა, მათი სახელი და გვარი.

2. ლიკვიდაციის პროცესში ყოფნის შემთხვევაში დოკუმენტზე დამატებით უნდა მიეთითოს ის ფაქტი, რომ მიმდინარეობს ორგანიზაციის ლიკვიდაციის პროცესი, აგრეთვე ლიკვიდატორის ვინაობა.

### **მუხლი 5. ორგანიზაციის მიზანი**

1. ორგანიზაციის მიზანია, ფორმალური და არაფორმალური პროფესიული განათლების ფარგლებში ყველა საფეხურის პროფესიული საგანმანათლებლო პროგრამების განხორციელება დეკორატიული მეზღვეობის სპეციალობაში, აგრეთვე მოსამზადებელ ზოგადსაგანმანათლებლო, ქართული ენისა და ლიბერალური განათლების საგანმანათლებლო პროგრამების განხორციელება.
2. ორგანიზაცია შეიძლება ეწეოდეს სხვა საქმიანობას, რაც აკრძალული არ არის კანონმდებლობით და რაც შეესაბამება ეკლესიის ავტორიტეტს, ქრისტიანულ მოძღვრებასა და რომელიც პირდაპირ და/ან არაპირდაპირ ემსახურება ორგანიზაციის მიზნის განხორციელებას.
3. სამეწარმეო ხასიათის საქმიანობას ორგანიზაციისათვის შეიძლება ჰქონდეს მხოლოდ დამხმარე ხასიათი და ამგვარი საქმიანობით მიღებული ყველა შემოსავალი უნდა მოხმარდეს მხოლოდ ორგანიზაციის მიზნების მიღწევას.

## **თავი II**

### **დამფუძნებელი. მმართველი ორგანოები**

### **მუხლი 6. ორგანიზაციის დამფუძნებელი**

1. ორგანიზაცია არ არის წევრობაზე დაფუძნებული იურიდიული პირი.
2. ორგანიზაციის დამფუძნებელია სრულიად საქართველოს სამოციქულო ავტოკეფალური მართლმადიდებელი ეკლესია (იგივე – “საქართველოს საპატრიარქო”) (იურიდიული მისამართი: ქ. თბილისი, ერეკლე II-ის მოედანი №1, გადასახადის გადამხდელის №204395537).

### **მუხლი 7. ორგანიზაციის დამფუძნებლის კომპეტენცია**

1. ორგანიზაციის უმაღლესი მმართველი ორგანოა ორგანიზაციის დამფუძნებელი.
2. დამფუძნებელი გადაწყვეტილებას იღებს ერთპიროვნულად, მათ შორის, შემდეგ საკითხებზე:
  - ა) ორგანიზაციის ლიკვიდაცია და რეორგანიზაცია;
  - ბ) ორგანიზაციის ბიუჯეტისა და ცალკეული პროექტების დამტკიცება;
  - გ) ორგანიზაციის ქონების გასხვისება და ვალდებულებებით დატვირთვა, ორგანიზაციის მიერ იმ გარიგების დადება, რომელიც სცილდება ორგანიზაციის საწესდებო საქმიანობის ფარგლებს, ან რომლის ღირებულებაც აღემატება დამფუძნებლის მიერ დადგენილ ზღვარს.
  - დ) ორგანიზაციის (კოლეჯის) დებულებითა და შინაგანაწესით განსაზღვრული საკითხები;
  - ე) ორგანიზაციის ფუნქციონირებასთან დაკავშირებული სხვა ნებისმიერი საკითხი, რომელთა შესახებ გადაწყვეტილების მიღებას მიზანშეწონილად მიიჩნევს დამფუძნებელი.

### **მუხლი 8. აღმასრულებელი ორგანო.**

1. ორგანიზაციის აღმასრულებელი ორგანოა დირექტორი.
2. დირექტორი ინიშნება უვადოდ.
3. დირექტორს ნიშნავს და ათავისუფლებს დამფუძნებელი.
4. დირექტორი
  - ა) მოქმედებს ორგანიზაციის სახელით, წარმოადგენს მას როგორც ქვეყნის შიგნით, ისე მის ფარგლებს გარეთ; ორგანიზაციის სახელით დებს ხელშეკრულებებს.
  - ბ) ხელმძღვანელობს პროგრამებისა და პროექტების შედგენას და უზრუნველყოფს მათ რეალიზაციას;
  - გ) დამფუძნებელს დასამტკიცებლად წარუდგენს ორგანიზაციის საქმიანობის ძირითად მიმართულებებს, გეგმებსა და მიზნობრივ პროგრამებს, წლიური საქმიანობის ანგარიშს;
  - დ) უზრუნველყოფს დამფუძნებლის გადაწყვეტილებათა შესრულებას;
  - ე) ამტკიცებს ორგანიზაციის (კოლეჯის) შიდა დებულებასა და კოლეჯის შინაგანაწესს;
  - ვ) უზრუნველყოფს ორგანიზაციის საფინანსო საქმიანობის კანონიერებას.
  - თ) უზრუნველყოფს საქმისწარმოებას საქართველოს კანონმდებლობით დადგენილი წესით
  - ი) დებს შრომით კონტრაქტებს ორგანიზაციის სახელით;
  - კ) ასრულებს ამ წესდებითა და დამფუძნებლის აქტებით დადგენილ სხვა ფუნქციებს.

### **მუხლი 9. წარმომადგენლობითი უფლებამოსილება**

1. ორგანიზაციის ერთპიროვნული წარმომადგენლობითი უფლებამოსილება მინიჭებული აქვს ორგანიზაციის დირექტორს..
2. დირექტორი მოქმედებს დამფუძნებლის გადაწყვეტილების ფარგლებში, ამასთან ორგანიზაციის დაფუძნების აქტით დადგენილ შემთხვევებში გარიგებს დებს მხოლოდ დამფუძნებლის თანხმობის საფუძველზე და ამ თანხმობის ფარგლებში.

### **თავი III. ცვლილებები წესდებაში რეორგანიზაცია და ლიკვიდაცია**

### **მუხლი 10. ცვლილებები წესდებაში**

1. ცვლილებები ორგანიზაციის წესდებაში შეიტანება დამფუძნებლის ერთპიროვნული გადაწყვეტილებით.
2. ნებისმიერი ცვლილება, რომელიც წარმოადგენს სარეგისტრაციო ფაქტს, სანოტარო წესით დამოწმებული სახით უნდა წარედგინოს ორგანიზაციის მარეგისტრირებელ ორგანოს.
3. ორგანიზაციის დირექტორი ვალდებულია უზრუნველყოს სარეგისტრაციო ფაქტების წარდგენა მარეგისტრირებელი ორგანოსათვის.

### **მუხლი 11. რეორგანიზაცია; ლიკვიდაცია**

1. ორგანიზაციის რეორგანიზაცია და ლიკვიდაცია ხდება დამფუძნებლის გადაწყვეტილებით, ხოლო კანონმდებლობით გათვალისწინებულ სხვა შემთხვევაშიც ლიკვიდაცია ხდება დამფუძნებლის გადაწყვეტილების გარეშე.
2. ინფორმაცია ლიკვიდაციის შესახებ უნდა გამოქვეყნდეს. ლიკვიდაცია სორციელდება კანონმდებლობით დადგენილი წესით. ლიკვიდაციის დროს უნდა დამთავრდეს მიმდინარე საქმეები, დადგინდეს მოთხოვნები, დარჩენილი ქონება გამოიხატოს ფულში, დაკმაყოფილდნენ კრედიტორები.
3. ორგანიზაციის ლიკვიდაციის შედეგად დარჩენილი ქონება გადაეცემა არაკომერციულ (არასამეწარმეო) იურიდიულ პირს, რომლის მიზანია ქრისტიანული (მართლმადიდებლური) განათლება. ქონების მიღებაზე უფლებამოსილ კონკრეტულ სუბიექტს ლიკვიდაციის შესახებ გადაწყვეტილების მიღების მომენტში ადგენს ორგანიზაციის დამფუძნებელი. თუ არ დადგინდა ქონების მიღებაზე უფლებამოსილი კონკრეტული სუბიექტი, მაშინ ქონება განაწილდება საქართველოს კანონმდებლობით დადგენილი წესით.

**სრულიად საქართველოს სამოციქულო ავტოკეფალური მართლმადიდებლური ეკლესია**  
(იგივე – “საქართველოს საპატრიარქო”)  
(რწმუნებული დეკანოზი მიქაელი (სამოქალაქო სახელი – მიხეილ მოტკოველი)